

AGAMA ITU NASIHAT

DUSTA

Dusta itu ialah membenarkan dari hal suatu sebalik daripada keadaan atau kejadian yang sebenarnya, membenarkannya itu terkadang-kadang dengan tulisan dan terkadang-kadang dengan isyarat dan terkadang-kadang pula dengan perbuatan – diam atau gerak. Dusta itu sebenar-sebenar cela, serendah-rendah kekurangan, seburuk-buruk perangai dan kepala serta punca bagi sekalian kecemaran dan kejahatan. Di dalam dusta itu terkandung semua kejahatan. Dusta itu pokok bagi maksiat yang besar-besaran. Dusta itu ada dua macam:

1. Dusta yang tidak mengenai orang yang seperti menceritakan sesuatu hal begitu dan begini pada hal perkara itu tidak berlaku.

2. Dusta atas nama seseorang seperti seseorang berkata:

“Si anu berkata begitu begini” pada hal orang itu tidak berkata atau ia berkata : “Si anu kerjakan begitu begini” pada hal orang itu tidak mengerjakannya. Dusta bagi kedua itu dinamakan aftari. Sungguhpun dosa aftari ini amat besarnya tetapi dosa dusta bagi yang pertama itu tidak pula kecil. Firman Allah di dalam al-Quran yang maksudnya: “Mereka akan dapat azab yang pedih dengan sebab telah berdusta” (Surah al-Baqarah ayat 10).

Firman Allah lagi yang maksudnya: Tidak membuat dusta melainkan orang-orang yang tidak beriman kepada ayat-ayat Allah dan mereka itu ialah orang-orang berdusta. (Surah An-Nahl ayat 105).

Rasullullah (SAW) telah bersabda yang maksudnya: “Tanda orang munafik itu tiga – apabila berkata-kata ia berdusta; Apabila ia berjanji ia menyalahinya; dan apabila dipercaya ia khianat.” (Hadis Sahih Riwayat Bukhari dan Muslim)

Sabda Rasullullah (SAW) lagi yang maksudnya : “Jauhilah diri kamu daripada berdusta kerana dusta itu membawa kepada maksiat dan maksiat itu membawa kepada neraka”. (Hadis Sahih Riwayat Bukhari dan Muslim)

Firman-firman Allah dan sabda-sabda Rasulullah (SAW) itu hendaklah kita perhati dengan bersungguh-sungguh dan janganlah kita lupa bahawa sekurang-kurang seksa itu ialah api neraka ; dan di dalam dunia terpandang sebagai munafik; dan pembuat dusta itu Allah namakan orang yang tak percaya kepada ayat-ayatnya dengan demikian itu maka tidakkah cukup seksa dan hina bagi dusta itu dan belumlah sampai masanya kita meninggalkannya.

Oleh kerana dusta itu suatu maksiat yang keji maka telah terbit daripada mulut-mulut ulama-ulama, hikmah, falsafah dan syarak perkataan-perkataan yang menjauhkan manusia daripada dusta itu. Mereka itu berkata “pendusta itu tidak mempunyai kehormatan. Bisu lebih baik daripada dusta.”

“Barangsia terkenal dustanya – maka ia tidak dipandang baik kebenarannya”

“Pendusta lebih jahat daripada tukang laga kerana tukang laga itu memindahkan perkataan seseorang kepada seseorang (melaga-lagakan perkataan di antara satu sama lain). Ini boleh dijaga. Adapun pendusta itu membuat percakapan daripada dirinya sendiri.”

Seorang ahli falsafah telah ditanya : “Apakah buah yang didapat oleh pendusta ?” jawabnya : “Hilangnya kepercayaan orang kepadanya.”

Yang lebih besar dosanya daripada sekalian jenis aftari itu ialah aftari atas nama Allah dan Rasul-nya seperti firman Allah yang maksudnya: “Bukankah tidak orang yang lebih teraniaya (kepada dirinya) daripada orang yang membuat aftari kepada Allah satu dusta atau ia mendustakan ayat-ayat Allah? Sesungguhnya orang yang zalim itu tidak akan dapat kejayaan.” (Surah al-An'am ayat 21).

Rasullullah (SAW) bersabda yang maksudnya “sesungguhnya satu dusta atasku tidak seperti dusta atas seseorang. Oleh itu barang siapa berbuat dusta di atasku dengan sengaja hendaklah ia mengambil tempatnya di neraka.” (Hadis saihriwayat Bukhari dan Muslim)

Kerana aftari dengan nama Allah dan Rasul-Nya itu akan diikut orang dan dengan itu manusia sebahagian kecil ataupun sebahagian besarnya akan tersesat dan sasar. Orang alim dan guru-guru hendaklah ingat bahawa kalau ia berkata: Agama perintah begitu atau begini atau agama teguh ini pada hal tidak ada dalam al-Quran dan al-Hadis maka bolehlah kita mengenakan kita beraftari atas Allah dan Rasul-Nya sekalipun ada di dalam kitab-kitab ulama. Menurut perasaan yang adil dan perasaan berkemanusiaan memang tidak baik jika kita bercakap dengan seseorang yang percaya kepada kita sedang perkataan kita itu dusta sebagaimana sabda Rasullullah (SAW) yang maksudnya: “Hinalah benar jika engkau ceritakan suatu kepada saudaramu pada hal ia memandang engkau benar sedang engkau berdusta kepadanya.” (Hadis Riwayat Ahmad).

Selain daripada dusta yang besar-besar itu kerap kali juga kita berdusta dengan tidak kita sedari atau kita sangka ia bukan dusta ataupun kita pandang tak mengapa dalam bergurau dan ada pula orang berkata: Tak mengapa kita berdusta bagi menyenangkan hati saudara kita, padahal semuanya itu ditegah seperti sabda junjungan kita Muhammad (SAW) yang maksudnya: “Barangsiapa berkata kepada seseorang anak: mari ke sini, ambil ini, kemudian ia tidak beri maka yang demikian itu satu dustanya” (Hadis Riwayat Ahmad).

Sabda Rasullullah (SAW) lagi yang maksudnya: “Aku akan jadi ketua di sebuah rumah di tengah-tengah syurga bagi orang yang meninggalkan dusta walaupun ia bergurau.” (Hadis Riwayat Abu Daud).

Sabda beliau lagi yang maksudnya: “Kecelakaan didapatkan

oleh orang-orang yang bercakap dengan perkataan supaya orang tertawa tetapi ia berdusta. Kecelakaanlah baginya! Kecelakaanlah baginya!” (Hadis Riwayat Abu Daud dan at-Tirmizi).

Pendeknya hendaklah kita kaum muslimin menjauhi dusta dengan sedap-dapatnya baik dalam perkara yang besar atau pun kecil. Orang yang berdusta itu hendaklah ia malu kepada dirinya sendiri. Malu kepada anak isterinya yang tentu akan mengetahui sifatnya itu; malu kepada sahabat handainya yang lambat laun akan mengetahui dustanya, malu kepada Rasulullah (SAW) yang ia akan minta syafaatnya pada hari kiamat pada hari yang mana akan tertuliskan di lehernya sekalian amalnya yang baik dan yang jahat, dan hendaklah ia malu kepada Allah yang mengetahui zahir dan batinnya sama ada pada siang hari atau malam, waktu terang atau gelap adanya.

(Dipetik daripada majalah al-Ihsan bilangan 4 bertarikh 27 Mac 1936).

-----*-----*

Bernasihat-nasihatlah kamu tentang ilmu, dan janganlah sebahagian daripada kamu menyembunyikan ilmu daripada sebahagiannya kerana khianat tentang ilmu itu lebih berat (dosanya) daripada khianat tentang harta – Hadis riwayat Abu Naim).

-----*-----*

Barangsiapa yang mempunyai tiga orang anak perempuan, atau tiga saudara perempuan, atau dua anak perempuan, atau dua saudara perempuan, lalu diajarkannya kepada mereka kesopanan, dan ia berbuat baik kepada mereka, dan ia kahwinkan mereka, nescaya ia dapat – syurga – (Hadis riwayat Abi Daud).

-----*-----*

Sebaik-baik sedekah itu ialah seorang belajar ilmu kemudian diajarkannya kepada saudaranya yang Muslim – Hadis riwayat Ibnu Majah)